

5. gr.

Markmið sjóðsins er að stuðla að framförum og menningu í Holtshreppi í Skagafjarðarsýslu, svo sem með því að styrkja frumbýlinga þar til bústofnskaupa, að verðlauna bændur í Holtshreppi fyrir góða umgengni og snyrtimennsku í búskap, að veita bændum þar viðurkenningu fyrir umbætur á jörðum sínum, að veita ungum mönnum í Holtshreppi styrk til náms, að styðja ungmennafélag til menningarstarfsemi og íþróttaiðkana og að styðja hvers konar aðra þá starfsemi, er stjórn sjóðsins metur til framfara og menningarauka í hreppnum.

6. gr.

Stjórn sjóðsins skipa þrír menn: hreppstjóri Holtshrepps, hreppsnefndaroddivitinn og einn maður tilnefndur af sýslunefnd Skagafjarðarsýslu til fjögurra ára í senn.

7. gr.

Stjórn sjóðsins skal sjá um, að fé hans sé jafnan ávaxtað í banka eða með öðrum tryggilegum hætti. Höfuðstól sjóðsins má aldrei skerða. Leggja skal hverju sinni $\frac{1}{4}$ ársvaxtanna við höfuðstólinn. $\frac{3}{4}$ hlutum ársvaxtanna má úthluta ár hvert.

Sé eitthvert ár enginn styrkur veittur, skal vaxtafé það, sem úthluta mátti, geymast á vöxtum, unz skilyrði eru til styrkveitingar samkvæmt framangreindum fyrirmælum.

8. gr.

Stjórn sjóðsins annast ávöxtun sjóðsins og reikningshald, tekur ávarðanir um styrkveitingar úr sjóðnum og hefur að öllu leyti á hendi stjórn hans.

9. gr.

Reikningsár sjóðsins er almanaksárið og skulu reikningar hans endurskoðaðir ásamt hreppsreikningum

10. gr.

Leita skal staðfestingar á skipulagsskrá þessari.

11. gr.

Skipulagsskráin óskast birt í B-deild Stjórnartíðinda.

11. maí.

Nr. 79.

Staðfesting forsetans á skipulagsskrá fyrir Minningarsjóð dr. Rögnvalds Péturssonar til eflingar íslenskum fræðum, útgefin á venjulegan hátt að mandatum af dómsmálaráðherra 11. maí 1964.

Skipulagsskráin er þannig:

SKIPULAGSSKRÁ

fyrir Minningarsjóð dr. Rögnvalds Péturssonar til eflingar íslenskum fræðum.

1. gr.

Sjóðurinn heitir Minningarsjóður dr. Rögnvalds Péturssonar til eflingar íslenskum fræðum. Sjóðurinn er eign Háskóla Íslands, og er ávöxtun hans í höndum rektors og háskólaráðs.

2. gr.

Sjóðurinn er stofnaður af ekkju síra Rögnvalds Péturssonar D.D. og dr. phil., frú Hólmfríði Pétursson í Winnipeg, og dóttur þeirra, ungfrú Margréti Pétursson, B.A., sómuleiðis í Winnipeg, á áttatíu og þriggja ára afmæli dr. Rögnvalds Péturssonar 14. ágúst 1960.

3. gr.

Stofnfé sjóðsins er 15000 — fimmtán þúsund — kanadadollarar, og er sá hluti sjóðsins varðveittur í Kanada, og 100000.00 — eitt hundrað þúsund — íslenskar krónur, sem varðveittar eru á Íslandi.

Háskólaráð er jafnan heimilt að gera aðrar ráðstafanir um geymslu höfuðstóls, ef nauðsyn krefur.

4. gr.

Árlegum vöxtum sjóðsins má úthluta afdráttarlaust, en stjórn sjóðsins getur ákveðið að draga saman vexti fleiri ára en eins til úthlutunar í senn. Þeim vöxtum, sem myndast hafa af höfuðstól sjóðsins nú þegar, er heimilt að úthluta við fyrstu úthlutun úr sjóðnum eða síðar.

5. gr.

Tilgangur sjóðsins er að styrkja kándidata í íslenskum fræðum frá Háskóla Íslands, sem reyndir eru að áhuga, dugnaði og góðum hæfileikum, til framhaldsnáms og undirbúnings frekari vísindastarfa.

Veita má sama manni oftár en einu sinni styrk úr sjóðnum.

Stjórn sjóðsins getur áskilið, að styrkþegi flytji fyrirlestra við Háskóla Íslands um rannsóknarefni sitt, og skulu þeir fyrirlestrar tengdir nafni dr. Rögnvalds Péturssonar.

Nú berst engin umsókn um styrk úr sjóðnum, er stjórn sjóðsins telur vert að sinna, og er þá heimilt að fresta úthlutun og úthluta síðar því fé, er til úthlutunar skyldi koma.

6. gr.

Stjórn sjóðsins skal eiga frumkvæði að því, að styrkir séu auglýstir til umsóknar, og skal umsóknarfrestur að jafnaði vera til 1. júlí, en styrkur skal veittur hverju sinni 14. ágúst.

7. gr.

Stjórn sjóðsins skipa þrír menn. Rektor Háskóla Íslands er sjálfkjörinn, og skal hann vera formaður. Hina tvo kys háskólaráð til fjögurra ára í senn. Varamenn eru vararektor Háskólans og tveir varamenn, er háskólaráð kys.

Stjórn sjóðsins skal halda gerðabók um úthlutun styrkja og annað það, er varðar hag og rekstur sjóðsins.

8. gr.

Háskólaráð lætur gera reikninga sjóðsins ár hvert, og skulu niðurstöður þeirra birtast í árbók Háskólans. Reikningar skulu endurskoðaðir með sama hætti sem reikningar annarra háskólasjóða.

9. gr.

Leita skal staðfestingar forseta Íslands á skipulagsskrá þessari, og skal hún síðar prentuð í B-deild Stjórnartíðinda og Árbók Háskólans.